

somma, es war ein grose turba und umbherlaufen, der ein
rieth das, der ander ain anders. In solchem lauft das clein
hündlin zur thür hinaufs. Do schreit graf Jacob: »Hinnach!
hinnach! lieben freundt! das ist der hundt, der unsinnig ist,
5 ir sehen, wie er fleucht; laufen hernach und schlachen ine zu
todt und braten mir die leber!« Uf solchen bevelch liefen
edelleut, jungfrawen, knecht, bueben und allerlai volks dem
hundt nach. Wie aber der hundt sicht, das man ime also
nachjagt, forcht er im noch mehr, und nit unbillich, dann es
10 galt im die haut und wolt man dem grafen die leber praten.
Also lief er ein stegen hinauf, die ander hinab, dann da,
dann dort, und war ein wildes gedresch nach dem hundt,
ehe man ine konte uffahen. Hiezzwischen aber war dennost
etwar so verstendig, der riete, man solt den hundt nit gleich
15 zu todt schlachen und die leber darvon braten, sonder ver-
suchen, ob er wietendt were, oder nit. Die mainung traf
doch letstlich für und das sich der graf liefs dessen settigen.
Also wie der hundt letstlichen gefangen wardt, do wolt man
ine mit dem essen versuchen, wie man sprücht, das kain
20 wüetender hundt gekochte speisen esse. Also da man dem
gueten hundt brates flaisch und andere guete bissle dar-
warf, ich glaub, er het ein halbs kalb gefressen, das man
wol sahe, das er nit wüetendt. Iedoch wolt man den kranken
grafen zu friden stellen, so muest man ime den under augen
25 bringen und essen lasen, das er zusahe. Damit war der
sach zum tail rath geschehen und das graf Jacob wider
etwas ein herz faste, wiewol er seiner schwester und andern
mit groser beschwerdt anzaigt, das es im zum herzen strich.
Was lamentation und clag sein schwester domals gefürt,
30 das haben vil leut gehört. Und wolt im graf Jacob nit
lasen die hosen abziehen, sonder man must im die ab dem
schenkel schneiden. Do befandt sich, das im der hundt
nur mit den zwai en zenen ein grifle geben het. Aber man
legt in dieselbig nacht mit groser ceremoni nider und wardt
35 sein nach dem bösten gewartet. Wie ich höre, so ist er
nie erwacht. Des andern tags ist er bösser worden und
hat man nach keinem wundarzet schicken dörfen. Ich glaub,
so es nit underkommen und das man ime die hundsleber
braten müesen, er dörf erst gar zu einem hundtskopf wor-
40 den sein.
Von seinen raisen überlandt do were ain sonder tractat
von zu machen; dann wann er an ain ort zu reiten willens,